

**Siunnersuut uunga: Isumaginnittoqarfiup aqunneqarnera aqqissuussaanelu pillugit
Inatsisartut peqqussutaata allanngortinneqarneranik Inatsisartut inatsisaat nr. xx.xx
2016.**

(Isumaginninnermi malittarisassanik kommunit aqutsinerannik atorunnaarsitsineq)
*(Ilaqutariinnermut, Naligiissitaanermut, Isumaginninnermut Inatsisinillu Atuutsitsinnermut
Naalackersuisumit saqqummiunneqartoq)*

pillugu

Ilaqutariinnermut Peqqissutsimullu Ataatsimiititaliap

siunnersuutip pingajussaaneerneqarneranut

ILASSUTITUT ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Tillie Martinussen, Demokraatit, siulittaasoq
Inatsisartunut ilaasortaq Agathe Fontain, Inuit Ataqatigiit, siulittaasup tullia
Inatsisartunut ilaasortaq Jess Svane, Siumut
Inatsisartunut ilaasortaq Laura Tàunâjik, Siumut
Inatsisartunut ilaasortaq Ineqi Kielsen, Siumut
Inatsisartunut ilaasortaq Ane Hansen, Inuit Ataqatigiit
Inatsisartunut ilaasortaq Mimi Karlsen, Inuit Ataqatigiit

UPA 2016-imi ulloq 27. maj 2016-imi aappassaaneerinninnerup kingorna siunnersuut
ataatsimiititaliap aammaarluni misissorpaa.

Siunnersuutip Inatsisartunit aappassaaneerneqarnera

Siunnersuutip aappassaaneerneqarnerani saqqummerpoq aappassaaneerinninnissaq ullormik
ataatsimik sioqqullugu siunnersuut pillugu eqqartuussissuserisup allakkiaanik
tungaveqartumik suliaq pillugu Kommuneqarfik Sermersuup tusarniaarnermut ilassutitut
akissuteqaataanik tigusaqartoqarsimasoq.

Tamanna tungavigalugu siunnersuut ataatsimiititaliamit suliarineqaqqittussanngorlugu
innersuunneqarpoq, taamaaliornikkut paasissutissanik nutaanik siunnersuummut
naliliinissamut pingaaruteqartunik saqqummertoqarsimanersoq ataatsimiititaliamit
nalilerneqaqqullugu.

Tusarniaanermut akissut

Appassaaneerininnissaq ullormik ataatsimik sioqqullugu ulloq 26. maj 2016-imi Kommuneqarfik Sermersuup tusarniaanermut ilassutitut akissutaa ataatsimiititaliamit tiguneqarpoq. Tusarniaanermut akissummut ilanngunneqarsimavoq inatsisissatut siunnersuut pillugu allakkiaraq eqqartuussissuserisumit Anders Valentin-Branth eqqartuussissuserisoqarfimmit Nielsen Nøragerimeersumit suliarineqarsimasoq. Tusarniaanermut akissutip aammalu eqqartuussissuserisup tassunga ilanngullugu allakkiata assilinerat isumaliutissiisummut **ilanngussaq 1-itut aamma 2-tut** ilanngunneqarput.

Siunnersuut piffissami ulloq 15. januarimit ulloq 19. februar 2016-imit tusarniaassutigineqarsimasoq ataatsimiititaliamit oqaatigineqassaaq, taamaattumillu suliaq pillugu Kommuneqarfik Sermersuup tusarniaanermut ilassutitut akissuteqaataa ulloq 26. maj 2016-imeersoq kingusissorujussuakkut nassiussineqartutut isigineqarsinnaalluni. Taamaakkaluartoq tusarniaanermut akissut ilanngunneqarlunilu naliliiffigineqarpoq.

Siunnersuineq

Siunnersuummik suliarinninnerminut atatillugu ataatsimiititaliap Ilaqtariinnermut, Naligiissitaanermut, Isumaginninnermut Inatsisinillu Atuutsitsinnermut Naalackersuisoq ulloq 29. maj 2016-imi siunnersiorpaa. Naalackersuisup oqaasissaasa allattorsimaffiata assilinerat isumaliutissiisummut uunga **ilanngussaq 3-tut** ilanngunneqarpoq. Tusarniaanermut ilassutitut akissummut atugassatut eqqartuussissuserisoqarfik Poul Smith ulloq 28. maj 2016-imi allakkiorimavoq. Allakkiap taassuma nuutinnera **ilanngussaq 4-tut** ilanngunneqarpoq.

Ataatsimiititaliap siunnersuummik suliarinneqqinnera

Kommuneqarfik Sermersuup suliaq pillugu tusarniaanermut ilassutitut akissutaata eqqartuussissuserisumit allakkiamik 23. maj 2016-imeersumik ilaqartup eqqartuussissuserisup allakkiannut ulloq 28. maj 2016-imeersumut, tassungalu ilanngullugu Ilaqtariinnermut, Naligiissitaanermut, Isumaginninnermut Inatsisinillu Atuutsitsinnermut Naalackersuisup ulloq 29. maj 2016-imi siunnersiorneqarnermini paasissutissat saqqummiussaasa sanilliunnissaannut ataatsimiititaliaq periarfissaqarsimavoq.

Suliaq pillugu Kommuneqarfik Sermersuup tusarniaanermut ilassutitut akissuteqaataa inatsisissatut siunnersuummut matumani pineqartumut allannguinissamik tungavissiinnigitsutut Ilaqtariinnermut, Naligiissitaanermut, Isumaginninnermut Inatsisinillu Atuutsitsinnermut Naalackersuisoq naliliisoq ulloq 29. maj 2016-imi siunnersuinermit ataatsimiititaliamit maluginiarneqarpoq.

Paasissutissat inunnut tunngasut pissusissaatut illersorneqarnissaat qulakkeerneqarsinnaaqqullugu paasissutissanut inunnut tunngasunut maleruagassat pillugit **ilanngussaq 4-mi** allassimasut Naalackersuisunit eqqumaffigineqarnissaat ataatsimiititaliamit qinnutigineqarpoq. Paasissutissat inunnut tunngasut illersorneqarnissaannut teknikikkut

aaqqissuussaankullu iliutsit ikorfartorneqarlutillu attanneqarnissaat pisariaqarsinnaavoq.

Namminersorlutik Oqartussat ilitsersuutaasa siumut isigisumik nukittorsaavigineqarlutillu pitsanngorsarneqarnissaat pisariaqartinneqartoq siunnersuummik aappassaaneerinninnermut akissuteqaammi Naalackersuisunit oqaatigineqarpoq. Meeqqanut inuusuttunullu ikorsiisarneq tapersiisarnerluunniit pillugit siunnersuummut nutaamut ilitsersuutissap atorneqarsinnaaningorlugu tunngaviusumillu isigalugu meeqqanut inuusuttunullu tunngasuni allaffissornikkut sullissisunit tamanit atorneqarsinnaasunngorlugu suliarineqarnissaa Naalackersuisunit qulakkearniarneqarmat ataatsimiititaliamit iluarisimaarneqarpoq.

Ilanngussaq 2-mi kaammattuut ataatsimiititaliamit maluginiarneqarpoq, tamatumani isumaginninnermut tunngasuni inatsisinut tunaartassanik suliaqartoqarnissaa kaammattuutigineqarluni. Inatsisinut tunaartassaqarnikkut isumaginninnermut suliaqarfimmi qanoq ilisukkut kommunit iliuseqarnissamut pisussaaffeqarnerisut aammalu qanoq pisoqarmat Naalackersuisut akuleruttariaqalersinnaasut Naalackersuisut kommuninut erseqqinnerusumik nassuiaatigisinnaavaat.

Isumaginninnermi maleruagassat ataasiakkaat taakkulu akornanni ataqatigiittoqarneranik aqutsinissamut ingerlatsinissamullu periutsinik assigiaarnerusunik suliaqartoqarnissaanik kaammattuutit ataatsimiititaliamit taparserneqarput. Taakku suliarinissaat allaffissornermi nukissanik atuiffiususaapput, taakkuli nunatsinni pissutsinut naleqqussaraanni kommuni sulianik ingerlatsisinut iluaqutissanngussapput, taamaattumillu ataatsimiititaliaq isumaqarpoq kaammattuutit malinneqassasut.

Isumaginninnermut suliaqarfimmi kommunini unammilligassat siunnersuutip appassaaneerneqarnerani annertuumik sammineqartut ataatsimiititaliamit maluginiarneqarpoq. Tassa isumaginninnermi suliaqarfik ataatsimut isigalugu aammali minnerunngitsumik meeqqanut inuusuttunullu tunngasut.

Isumaginninnikkut nunatsinni maanna pissutsit ataatsimut isigalugit minnerunngitsumillu nunatsinni meeqqat inuusuttullu ilaasa sumiginnarneqartut peroriartorneranni atugassarititaasut assut isumakulunnartut ataatsimiititaliamit imaannaanngitsutut isigineqarput.

Amigaatit 2015-ip aallartinnerani nakkutilliinermik nalunaarusiatigut qulaajarneqartut aammalu suliani suliarinninnikkut kinguaattoorfusimasuni amerlaqisuni pissutsinillu immikkut sakkortuumik isiginiartarialinnik imaqartuni innuttaasut pisortanit ikiorserneqarnissamik amigaateqartut piaartumik iliuseqarfineqarnissaannik ataatsimiititaliaq taamani sakkortuumik kaammattuuteqarnera ataatsimiititaliamit innersuussutigineqassapput.

Nunatsinni isumaginninnerup pilerseqqinneqarnissaa qulakkeerniarlugu siunnerfilimmik suliniuteqartoqassaaq. Suliassaarfik annertullunilu pisariummat aammalu suliassaq sivisuumik, ilungersunartumik aammalu sulisutigut aningaasatigullu atuiffiusariaqartoq ataatsimiititaliamit ilisimaneqarpoq.

Suliniutinik iliuutsinillu, isumaginninnermut suliassaarfimmi akisussaaffimmik kommunit aqutsillutillu isumaginninnissaanni kommuninut ikiorsiinissamik tamarmik siunertaqartunik, aallartitsisoqarsimasoq sulilu aallartitsisoqartartoq ataatsimiititaliamit ilisimaneqarmat oqaatigineqassaaq. Taamatut siumut ungasissumut isigaluni anguniagaqarneq pisariaqarpoq.

Maanna annertuumik isumakuluutigineqartoq tassaavoq meeqqanut inuusuttunullu tunngasuni pissutsit, tamatumani kommunit allaffissornikkut artukkerneqarsimapput aammalu illoqarfiit nunaqarfiillu ikigisassaangitsut kommunit meeqqanut inuusuttunullu tunngasuni allaffissornikkut ajalusooqqanerannik sunnersimaneqarlutik. Meeqqanut inuusuttunullu tunngasuni suliassat ima amerlatigilersimapput kommunit tunniutiinnartariaqarlutik Naalackersuisunullu ikioqqusariaqarlutik, taakkulu aamma kommunini suliassat ikilisarniarlugit ikiunnerminni allaffissornikkut annertuumik tatineqarput.

Ataatsimiititaliamili amerlanerussuteqartut suli isumaqarput inatsisissaq atuutsinneqalertariaqartoq, taamaaliornikkut qitiusumit sulisunit immikkut ikiorsiinikkut suli at amerliartuinnartut ikilisinneqarsinnaaqullugit, matunilu tikkuarneqassaaq Naalackersuisut kommunillu isumaginninnermut suliassaarfimmi assigiimmik anguniagaqartut ilimagineqartariaqarmat.

Pissutsit ajornartoorfiusut nakkutilliiartornermi qulaajarneqartut sapinngisamik sukkanerpaamik malitseqartinneqartariaqarput.

Sulinermi pisariaqartutut isigineqarpat peqqussutit ullumikkut atuuttut saniatigut isumaginninnermi maleruagassanik atorunnaarsitsineq pillugu aalajangiinernut najoqqutassanik suliqaarnissaannik Naalackersuisut ataatsimiititaliamit kaammattorneqarput.

Siunnersuutip matuma aappassaaneerneqarnerani oqaatsit *ajornartoorneq* aammalu *ajornartoornermi nuna tamakkerlugu pilersaarut* atorneqarput.

Pissutsit imaannaanginnerat aammalu meeqqat pillugit isumaqatigiissummi meeqqat pisinnaatitaaffiisa qulakkeerneqarnissaannut nunatta pisussaaffeqarnera aammalu akisussaaffimmik tamatuminnga sumiginnaanissarput akuersaarneqarsinnaangitsut Inatsisartunit, Naalackersuisunit kommuninillu ilisimaneqarpoq.

Pissutsit imaannaanginnerat isumakulunnarnerallu ataatsimiititaliamit qangarsuarli nassuerutigineqareerpoq, tamatumali peqatigisaanik ajornartorsiutip maanna qanoq annertutigalunilu qanoq ittuunera naalackersuinikkut paasinarsisinnissaa assut

ajornakusoorpoq. Kisitsisit silaannarmi erfapput aammalu isumaqartoqalersorlu ajornartorsiutit annertussusiat paasinarsisinneqalersoq ajornartorsiutit nutaat takkuttarput. Ukiut arlallit matuma siorna qulaajarneqarpoq meeqqanut inuusuttunullu angerlarsimaffiup avataanut inissinneqarsimasunut iliuusissatut pilersaarutit inatsisit malillugit suliarineqartussat suliarineqarneq ajortut aammalu pisariaqarnera malillugu nutarterneqarneq ajortut. 2014-imi qulaajarneqarpoq meeqqanut inuusuttunullu tunngasuni kommunit annertuumik sumiginnaasut kingullermillu ukioq manna 2016-imi suli erseqqinnerulerpoq kommunini allani isumaginninnermut tunngasut, tassungalu ilanngullugu meeqqanut inuusuttunullu tunngasuni suli at annertussusiat suliniutillu aqutsiviginiarneqarnerat aamma annertuumik ajornartorsiutaasoq.

Pissutsit taamaannerat naalackersuinikkut attanneqarsinnaanngilaq ajornartorsiutillu aaqiiviginiarlugit suleqatigiittoqartariaqarpoq. Tamanna pisariaqarpoq piffissaq qaninneq ungasinnerusorlu eqqarsaatigalugit. Ajornartorsiutit pisariaqalersippaat naalackersuinikkut allaffissornikkullu piaartumik sukumiisumillu iliuuseqartoqarnissaa.

Isumaginninnermik suliassa qarfimmu maleruagassat atuuttut malillugit suliassanik kommuninut tunniunneqarsimasunik isumaginninnissamut kommunit, kommuninut ataatsimoortumik tapiissutit aqutitigalugit aningaasaliiffigineqartarput. Aningaasat ikippallaarput, kukkusumilli atorneqartarsimanersut pillugu oqaaseqarnissamut ataatsimiititaliaq tunngavissaqanngilaq, ataatsimulli isigalugu isumaginninnikkut suliassa qarfimmi ajornartorsiutip qanoq annertutiginera aningaasanut inatsisissatut siunnersuut pillugu partiinik isumaqatiginninniarnissamut tamakkiisumik paasinarsisereeqqullugu ataatsimiititaliap Naalackersuisunut piumasarisavaa, taamaaliornikkut sulisut aningaasallu suliniutillu pisariaqartut pingaarnersiulluni tulleriarinnermut ilanngunneqarsinnaaqullugit. Nunatsinni akisussaaffik isumagineqarsinnaaqullugu *matumani, maanna siunissamilu isumaginninnermut tunngasuni suliassat isumagineqarnissaannut suut pisariaqarnersut* aningaasanut inatsit pillugu isumaqatigiinniarnernut partiinut ataasiakkaanut saqqummiunneqartariaqarpoq. Imaassinnaavoq aningaasat sulisullu allatut tulleriariffigineqartariaqartut, imaassinnaavoq ajornartorsiutinut naapertuuttunik ilisimasalinnik avataanit pissarsisariaqartugut immaqaluunniit pisariaqarpat imigassaq pillugu politiki aningaasanoorsinnaanerluunniit piffissami sivikinnerusumi sivisunerusumiluunniit iluarsisuteqarfigineqarsinnaasut, tassa ilaqutariinni pitsaasumik inuuneqarnissaq qulakkeerniarlugu, taamaalillunilu sumiginnaaneq erngertumik annikillisikkumallugu, taamaaliornikkullu tamanna ima annertussuseqaleqqullugu suliamik ingerlatsisunit isumagineqarsinnaalerluni. Tamatuma saniatigut meeqqanut inuusuttunullu suliassa qarfimmi inatsisissatut siunnersuut kommuninut, isumaginninnermut tunngasuni artukkerneqareersunut suliassanillu isumaginninniarnermi kinguaattooqqareersunut, suliassanik akisussaaffinillu amerlanerusunik tunniussinermik kinguneqartussaq ungasinngitsukkut suliarsussaavarput.

Nunatsinni meeqqat inuusuttullu atugaannik patajaallisaanissami suleqatigiinnissaq salleryaassaaq.

Suliassaqarfinni siuliani taaneqartuni siuariarnerit pillugit ingerlaavartumik ilisimatinneqarnissani ataatsimiititaliap qinnutigaa.

Ataatsimiititaliap inassuteqaatai

Ataatsimiititaliami amerlanerussuteqartut Demokraatit Siumullu ilaasortaataat siunnersuut pillugu ima oqaaseqaateqassapput:

Pilertortumik iliuseqarnissamut, pilertortumik aalajangiisoqarnissaanut aammalu isumaginninnikkut suliassat uninngatinneqartut piffissami sivisuallaarujussuarmi utaqqitinneqarsimasut agguataarneqarnissaasa eqqumaffigineqarnissaasalu qulakkeerneqarnissaanut isumaginninnermi maleruagassanik atorunnaarsitsisinnaaneq periarfissiisutut ataatsimiititaliami amerlanerussuteqartunit isigineqarpoq.

Ineriartornertik ulorianartorsioqqunagu innuttaasut aalajangiisoqarnissaanik pisariaqartitsisut, kommunili isumaginninnermut suliassani kinguaattoorutit ikilisinneqarnissaanut periarfissaqanngitsillugu, tassa suliassaqarfinnut pineqartunut sulisussanik ilinniarsimasunik kommunit amigaateqarnerat pissutigalugu ikiorserneqartussat Naalackersuisunit pisussaaffeqarfigineqartutut isigineqartut imaluunniit kommunini sulisussatigut annertuumik tatisimaneqartuni iliuseqarnissamut inatsisitigut matumani tunngavissiiniarneq periarfissiisutut amerlanerussuteqartunit isigineqarpoq.

Allatut oqaatigalu ilisimasat katersukkat nuna tamakkerlugu isumaginninnikkut naleqqussaannermut atorneqarnissaat kiisalu periutsit aalajangersimasut pitsaanerpaasutut isigineqartut (*Best Practices*) pigineqarsimappata ilanngunneqarnissaat aammalu ataatsimooqatigiiffinnut nunatta avataaniittunut ikioqqusinnaaneq; soorlu nunat avannaamioqatigiit suleqatigiiffiannut, naalagaaffeqatigiinnut imaluunniit isumaginninnerup iluani suliassat ikilisarnerlugit ikiorsiissutaasinnaasut pisariaqartut allat atorneqarsinnaanerat.

Inatsisissatut siunnersuut una unammilligassat taakku iliuseqarfiginiarneqarnerattut ataatsimiititaliami amerlanerussuteqartunit isigineqarpoq, isumaqarlutillu kommunalbestyrelsinut akiliisitsinerinnakkut kommuninulluunniit kaammattuuteqarnerinnakkut taakku aaqinneqarsinnaanngitsut, taakkumi isumaginninnikkut suliassaqarfinni kommuninut akisussaaffimmunik naammassinnissimanngitsunut tunngatillugu ullumikkut taamaallaat iliuserineqarsinnaasutut periarfissiissutaammata.

Kommunit aningaasaqarnikkut aqutsivigineqarneranni suleqatiginnikkusussutsip takutinneqartartup assingata atorneqarnissaa aammalu taamatut isumaginninnermi maleruagassanik atorunnaarsitsisoqarsimappat kommunit unammilligassaannik

nalilersuisoqarnissaa, katersisoqarnissaa aaqqiissutissanillu aaqquussisoqarnissaa amerlanerussuteqartut Naalackersuisunut kaammattuutigaat.

Isumaginninnermi maleruagassat nunatsinnilu inatsisit iluanni aalajangigassatigut kinguaattoorutit amerlanerussuteqartunit pinartutut nunatsinni naalackersuisunit ernertumik iliuseqarfigineqartariaqartutut isigineqarpoq.

Amerlanerussuteqartunit erseqqissarneqassaaq unammilligassat kommunit taamaallaat aaqquivigineqartussatut isigineqanngimmata, tassaallutilli nuna tamakkerlugu ajornartorsiutit tamanit peqataaffigineqartumik aaqquivigineqartariaqartut.

Ajornartorsiutinik taakkartorneqartunik taakkuninnga aaqquinnissamut inatsisip pineqartup sakkussatut isigineqarnera amerlanerussuteqartut akuersaarpaat, tamannalu tunngavigalugu siunnersuut akuerineqassasq inassutigeqqillugu.

Tamanna tunngavigalugu ataatsimiititaliami amerlanerussuteqartut siuliani taaneqartut siunnersuut taama iluseqarluni Inatsisartunit akuerineqassasq inassutigaat.

Ataatsimiititaliami ikinnerussuteqartut Inuit Ataqtigiit siunnersuut pillugu ima oqaaseqaateqassapput:

Pineqartut tassalu kommunit tamarmiullutik siunnersuut akuersaanngilaat, taamatuttaaq kommunit Kattuffuata KANUKOKA-p sunnersuut akuerinngilluinnarpaa.

Tassa imaappoq, suleqatissat tamarmik siunnersuut akuersaanngilaat.

Inuit Ataqtigiit assorsuaq ajuusaarutigaarput, suleqatigiittussaagaluit imminnut taamak ungasitsigimmata.

Komuniniit KANUKOKA-miillu ersarissarneqarpoq Nam.Oqartussat inatsisinut ilitsersuutaat paasiuminaatsorujussuusut. Ukiorpaalunnilu kissaatigineqartuarsimagaluartoq, paasinarnernulersinnissaat. Na. Oqatussat nakkutilliisarnerat ukiut sisamakkaartuusq, akulikillisinneqarsinnaagaluartoq, taamaalilluni suliat tuaviortut uninngannginnissaat anguneqarsinnaagaluarimat.

Assortuussutaanngilaq ullumikkut kommunit sumiginnaanerat annertummat, Inuit Ataqtigiinniit erseqqissarlarput kommunit, Nam.oqatussalluuniit sumiginnaasarnerat akuerineqanngimmat. Sulineq pitsanngorsartariaqarpoq, meeqqat pineqarmata, meeqqallu sumiginarneqassanngimmata.

Massakut peruseriniagaq imatut paasineqarsinnaavoq, equngasumik ingerlatsisoqarmat, Inatsisitigut equngasumut tulluarsartoqarnialersq. Assersuutigalugu illup natia innarlarsimammat, taava illup pisatai natermiittut, equngasunngortinniarpagut, tulluarsarlugit.

Innarlerneqarsimasoruna aaqinneqartariaqartoq, innarlarsimasumut tulluarsanata.

Taammaattumik Inuit Ataqtigiiniit Naalackersusiut kaammatorusuppagut, kommunit qanimut suleqatigalugit innarlarsimasoq aaqinneqaqqullugu.

Borgmesterit kaammatorusuppagut Kommunit aqunneqarnerat pillugu Inatsisartut inatsisaat nr.22, 18 nov.- 2010 malillugu § 19-mi suliassatik isumageqqullugit. Suliassat suliarineqarneri nakkutigeqqullugit, pisariaqartunilu ilitsersuusiornissat aaqqissuutissallugit.

Kommunit ilaanni tusakkagut: Suliassat 1000 sinnerraat ersiutaavoq Borgmesterip suliassani suliarinngikkai.

Ikinnerussuteqartugut immikkut maluginiarparput, inatsisilerituut nalilersuisarnerat assortuussinaasoq, suliassap isikkoqarneratigut. Isumaliutissiisummut suliat kingulliit ilanngunneqartullu tamanna ersersippaat, tamannalu kommunit eqqartuussivikkut inatsisip nalilerneqarsinnaaneranut kaammattuinerusutut isikkoqarpoq, tamanna ikinnerussuteqartut eqqarsarnartoqartipparput.

Politikkikkut suliassanut akisussaaffinillu agguataarinerput allanngortiniissaanut Naalackersuisuniit siunnertarineqarsimanerpa, Inuit Ataqtigiinnili Kommunit suleqatigilluarnissaat qinerparput siunnersuut akuersaangilarput.

Tamanna tungavigalugu **ataatsimiititaliami ikinnerussuteqartut siuliani taaneqartut** siunnersuut itigartinneqassasoq **inassutigaa**.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut pingajussaaniigassanngortippaa.

Tillie Martinussen
Siulittaasoq

Agathe Fontain

Jess Svane

Laura Tàunâjik

Ineqi Kielsen

Ane Hansen

Mimi Karlsen